

и погребоша честно с пением надгробным. И от того корене Ингоря поидоша резанския князи, даже и до ныне род их. От Резани же поиде Батый в Русь, и плени всю землю и грады разори, и князей местных многих побит, кроме Великого Новаграда, и Пскова, и Поморья. Но и паче же всех злейши начат оттуду быти частое нашествие поганых царей и князей на Резанскую землю, яко же о Мамаи безбожном и Темир Аксаце пишет из иных многих, тако ж и от крымцов и нагайцов, яко же и до ныне. Того ради земля та мало человечна и грады пусты и не тверди суть. Тако же и прочие замосковные города и подмосковные, начен от Твери и по самое поле на восток, градов крепких и твердых несть, понеже ныне погании токмо изгоном приходят и не великим воинством и без наряду. Не якоже от западных и южных страны, немцы и Литва со огненным боем и з градобийственными козньми, но токмо стрелы и мечи с собою имуть. Того ради градов каменных тамо не зиждут. Яко же во всей России пресловущий великий град Псков каменный четырьмя стени огражден, да новый град Смоленск. Инии же мали быша грады — теми немцы обладаша. Грады бо суть тверди верою, и державою, а не стени, ни людьми! Яко ж Давид рече: „Аще не господь сохранит град, всуе бдя стрегий его“, но советом и любовию тверд бывает всяк град, а безсоветия ради и нелюбве разоряютца. Яко же преже речено бысть, тако и ныне тоже творится. О злых властех мздоимных и неправду творящих, и насилующих, и о казни божи. Яко же изволися человеколюбцу богу о своей твари на вся времена промышляя, роду человеческому полезная даруя, нашего хотя покаяния, яко же древле во Израили и во всех странах казни быша от бога различны. Тако и ныне последнему роду Новому Израилю беды наводит, или глад, или мор, или рать, или огонь, за неустроение сущих властей. Сим бо приводит владыка наш Христос человеческое неродство на покаяние и на воспоминание дел неподобных, еже сотворихом. Ибо злая творяще и неподобная, предани бываем злым и немилостивым властем грех ради. Они же тако же не боящися страха божия, зле власть правяще, но ни тии убежат суда, суд бо без милости несотворшим милости. О Светополке Киевском князе, как зле княжил, о нем же пишет в Патерике Печерском. В то бо время в глад, некий старец Прохор в лебеде хлебы печаше, а пепелом в соли место соляше все. Богу прославьшу его сим дарованием, а злаго князя сего о лихоимстве посрамляше. Во дни княжения своего в Киеве Светополк сын Светославль много насильство сотвори православным: дома сильных искорени без вины и имени многие отъем. Его же ради господь попусти поганым имети силу на нем, и быша брани многи от половец. К сим же усобица у князей о градах, и о державствах, и во всех людех. Бысть в та времена глад крепок и скудость велия при всем в Рустей земли. Тогда в Киевских Печорах прослави бог некоего мниха именем Прохора нарицаемого Лебедник таковы ради вины. Сему бо старцу богоудно живущу, и господь даст ему благодать свою сицеву, яко же ни в древних слы-